



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

**CWG 2026: Gulveer-i silver medal
ngua otsü tasen yangluogo**

**Japan menoknok nung asür
nisung 18 jungogo**



VOL. XXIII ISSUE NO. 287 (ADOK 287) DIMAPUR YANGTEPNÜ (THURSDAY) CHITENI (JULY) 30, 2026

₹ 5.00

Manipur nung Naga Village Guard khaset; 4 yiru

Imphal, July 29, 2026 (Agencies): Manipur kübok Noney district nung Bodbarnep Naga Village Guard (NVG) ka khaset aser Central Reserve Police Force (CRPF) sepai ana dena nisung pezü yiru.

Tanep 8:00 ako meta CoBRA commandos aser CRPF personnel-i Lavo nung Naga village volunteer camp ka mita aodang iba lendong atalok.

Iba mapang sepaitem o village guards tsüngda minute 30 shi khatep aser idangji NVG ka khaset aser ano village guards ana yiru.

Iba lendong nung taküm samaba ya Kadirang Liangmei'er jabaso Lianbilung Liangmei (22) ta jangjaogo.

Iba tatalokba nungsa CRPF 186th Battalion nung Head Constable Radheshyam aser Constable Jitendrakumar na yiru.

Iba tatalokba nung yiruba village guards ana indang maitsü memetdaktüsü lir.

Iba tatalokba sülen security personnel talila mapa lemozüksüogo aser ozüng alema arms & ammunition benshiba village guards pua arutsü atema search operation ka tenzükogo.

Iba lendong atalokba sülen Longmai area nung yimtsüng balala nungi tetsürtem aser lanurtem adenshir lungkak ait.

Sepaitemi village guards anema tashiyim benshiogo ta

parnoki tai tonglochtsü.

Naga telok aikati iba tatalokba aitsüogo aser Kuki telungpur dang nungi yimtsüng kümzüka ayuba civilians amak ta parnoki ashir.

"Kangpokpi district nung Kuki teloktemi Naga nunger civilian trok tepsetba atema temeten mangu aliba mapang ka lir. Ajisüaka Bitiang nung iba mapa inyakba aitsür, village guards ya pei yimtsüngtem lendong nungi kümzüka ayurtem lir aser parnok ya telungpurtem ama züngshitsü makok" ta Foothill Naga Coordination Committee (FNCC) convenor Ng Akhiu-i ashi.

"Sepaitemi Naga yimtsüngtem nung operations agir saka Suspension of Operations (SoO) agreement kübok aliba Kuki telungpur teloktem designated camps anemabo mapa kecha meinyaker. Iba amai tejak repranga bendanga amshi nungbo yimjung arutsü melen a tensa tamajungba akümtsü akok" ta Ng Akhiu-isa metetdaktüsügo.

Külen, Inpui, Liangmei, Rongmei aser Zeme nunger adenba Joint Tribe Council (JTC), Manipur-i emergency shutdown metetdaktüsügo. Temeten mangu tashi iba mokdang alitsü ta JTC, Manipur-isa ashi.

Iba osang zülü tashi nung CRPF, Manipur Police, mesüra district administration nungi osang kecha mali.

NLA nung NPP Legislature Party melenshir

Dimapur, July 29, 2026 (TYO): Nagaland Legislative Assembly nung National People's Party Legislature Party tetentshiba osang ka metetdaktüsügo.

Nagaland Legislative Assembly nung National People's Party Legislature Party Leader inyaktüsü atema A. Nyamnyei Konyak shimmer. Iba ya NLA nung Legislative Wing tashi itshtitsü atema lir ta National President, NPP Conrad K. Sangma-i sangdong ka

nung metetdaktüsügo.

Taoba nung Nuklutoshi-i Leader of NPP Legislature Party inyaka liasü saka pa ket nungi iba mapa agiener ta NPP National President-isa ashi.

Bangdakpurtem National People's Party nung ketdangpurtem aser züngsemtemi iba tetuyuba sülen anidaktsü aser A. Nyamnyei Konyak den amalitepa yariteptsü metetdaktüsür ta Conrad Sangma-isa ashi.

Kidanger state 4-i Assam li atsünga agia lir

Guwahati, July 29, 2026 (Agencies): Assam den kidanger state pezüü ali 82,751.86 hectares atsünga agia lir ta state sorkari Assam Legislative Assembly nung metetdaktüsügo.

Rajior Dal MLA Akhil Gogoi-i asüngdangba ka langzüdang Border Protection and Development Minister Atul Bora-i ali atsünga agia alibaji Arunachal Pradesh, Nagaland, Meghalaya aser Mizoram nung lir ta ashi.

State tem rongnung Nagaland-i Assam li tuluba agia lir aser ibaji 59,490.21 hectares lir. Nagaland sülen Arunachal Pradesh-i 16,144.01 hectares, Mizoram-i 3,675.78 hectares aser Meghalaya-i 3,441.86 hectares atsünga agia lir ta Minister Bora-isa metetdaktüsü.

Item state temi Assam ali shilem tuluka parnok meyong ta ashir. Nagaland-i Assam ali 12,882.6 sq km, Meghalaya-i 2,732.14 sq km, Mizoram-i 927.74 sq km aser Arunachal Pradesh-i 858.91 sq km parnok meyong ta ashir.

State sorkari mapang talangka mebenteti aruba arrtsü ken o tem kidanger state tem den olemtep ajanga angatetteptsü meranger ta Bora-isa ashi.

"Union Home Ministry-i tuyuba ama Meghalaya aser Arunachal Pradesh den bilateral agreements nung sign sütepogo" ta paisa shisem.

Assam-i Meghalaya den 884.9 km, Arunachal Pradesh den 804.1 km, Nagaland den 512.1 km aser Tripura den 46.3 km agi interstate boundaries lir.

Yadav aser Dr Rio nati Red Cross Society tenüing asanger

Kohima, July 29, 2026 (TYO): Indian Red Cross Society ya küm noklang ka tema teimla, aria bilemba aser bendanga agüja tenzükba indang maitsü ka ama arur ta Nagaland Governor aser Indian Red Cross Society, Nagaland State Branch (IRCSN) President Nand Kishore Yadav-i ashi.

Lok Bhavan Kohima nung IRCSN indang 39 buba Annual General Meeting cum Ceremonial Function alidang Governor Yadav-i State Branch nem tenüingsang agütsü.

"Nagaland State Branch-i disaster preparedness & response, first aid, health awareness, blood donation, youth engagement aser community welfare maparen balala inyakba atema tenüingsang agütsür. Volunteers, members, district branches aser partners-i Red Cross Society indang humanitarian mission tejakleni bener aoba atema pelar" ta Governor Yadav-i ashi.

Alima lendong balala, public health emergencies, tsüingsang-mopung melenshiba, substance abuse aser tanga meimchir dak sendakba tebilemtsütem aika ajurur anungji Red Cross indang shilem kangasa tongtipang kümogo ta pai ashi.

Red Cross nung züngsem ajaki humanitarian service asoshi bendanga agütsüshitsü ayongzüker aser Indian Red Cross Society, Nagaland State Branch den sendaktepa alirtemi

mapa tajung inyakba atema tenüingsang agütsür ta Governor Yadav-isa metetdaktüsü.

Nagaland Chief Minister aser Indian Red Cross Society (IRCS), Nagaland State Branch Vice President Dr. Neiphiu Rio-ia Red Cross züngsem ajak nem tenüingsang agütsü.

"Indian Red Cross Society-i teti Humanity, Impartiality, Neutrality, Independence, Voluntary Service, Unity aser Universality tangatetbatem nung ajemdaker inyaksangshia arur. Red Cross-i public health, disaster preparedness, emergency response aser community welfare nung tongti shilem agia arudar" ta Dr. Rio-i ashi.

"IRCSN aser Nagaland State Disaster Management Authority (NSDMA) külemi yaritepa Community First Responders (CFR) training programme mapa tenzükba atema tenüingsang agütsür. Iba tesentaktep ajanga sorkar rejutem aser humanitarian organizations külemi inyakteter ta sayuogo" ta paisa ashi.

"Nagaland nung district 12 nung iba programme takok ngua tenzükogo aser iba ajanga essential first aid skills, disaster preparedness knowledge aser emergency response techniques sayur. Nagaland ya high seismic zone ka nung lir anungji menoknok, anentsüh aser tanga lendong balala ataloktsü ana nung dang lir anungji community-based

preparedness ya kanga nüngdaker" ta Dr. Rio-isa ashi.

Chief Minister-isa Indian Red Cross Society aser NSDMA dang Community First Responders programme ya Nagaland nung district, yimtsüng aser lokti shia nung ulushia inyaktüsü ayongzüker.

Sorkari disaster preparedness, voluntary blood donation, first aid education, youth volunteerism aser community resilience pusema nungittsü tenangzüka lir anungji sendaktepa alir ajaki maneni lanurtem ajungmesoa mapatem inyaktüsü ayongzüker ta paisa shisem.

"Alima lendong ajanga nisung mebendanger. Mon District nung tzünglu kanga aruba ajanga July 19, 2026 nü anentsüh tulu alua liasü aser iba mapang kin balala nungi nisungtemi meimchir tangatetba sayua yaritepogo. Iba lendong nung volunteers, government departments, aser reju balala longjemer relief & rescue operations inyakba atema tenüingsang agütsür" ta

Joint CEO, Nagaland State Disaster Management Authority (NSDMA) & Indian Red Cross Society, Nagaland (IRCSN) Managing Committee Member Dr. Johnny K. Ruangmei-i ashi.

"Indian Red Cross Society-i sorkar den teti yaritepa arur. Asenoki volunteer training nung temulung agütsütsüla aser ibaji talisa search & rescue operations kanga tongtipang lir" ta pai ashi.

Mokokchung anentsüh lendong nung taküm ana sama

Mokokchung, 29th July (TYO) Bodbarnep 1:00 ako meta Penli Ward, Mokokchung nung anentsüh lendong tulu ataloka kibong ka nungi adianu ana taküm sama, ta Home Guards, Civil Defence & State Disaster Response Force (SDRF) osang ajanga metetdaktüsü.

Tasüsang anaji Alisopur yimer Mr. Merenba Sangtam'er jabaso Queen Mary Higher Secondary School, Mokokchung nung Class XII azünger Mr. Muwalong Sangtam (arishi küm 19 tain) aser pa tenü kasa school nungisa Class XI azünger Mr. Thridiba Sangtam (arishi küm 16 tain) na liasü, ta osang ajanga jangjaogo.

Tanep Mokokchung Sangtam Baptist Arogo nung sarasadem ka agir tasümagji par tasoyim Alisopur-i bener oa yangji remogo, ta osang ajanga angazüker.

HG, CD & SDRF osang ajanga ashiba agi, iba tatalokba ya July 29 anepdang 1:00 ako meta angashi. Angashili mapang tatsüka tsüngta nung Company Commander Lanutemjen den SI Tingkam nadi anir SDRF jawantem lendong atalokba tesem jagi ilonga or kümzüka maparenji inyaka liasü.

Jawan-tem tesem tonga arudang jabaso tambusangbo lendong nungi kümzüker liasü, aji sür jawan-tem den kiyong-kinartem senteper anenbanger aliba tetsü taküm mesamai kümzüker. Ajisüaka, tia maka tanur ana (teti o tenu naji) mekümzükteti tasümag dang agitet. Iba atalokba mapang teubuo yimdam liasü ta angazüker. Tasür ana tebu ya Alisopur anasa yim ka nung tesayur mapa inyaker aser tetsüjia arogo nung toklang tenzüker ka lir, ta iba osangbeneri Penli pur ka den jembidang pai ashi.

SDRF jawan-tem den kiyong-kinartemi külemi yaritepa ghonda pezü dak tali anibelem tulu agia anentsüh yatoka bushir külen ang tasümag anaji anepdang 5:30 ako meta nguteta police nem nüngdakba maparen inyaktüsü agütsü, ta osang ajanga angazüker.

Deputy Commissioner Aji Kumar Verma IAS, Ao Senden tir Marsanen Imsong aser telok balalai lendong atalokba tesem semdanga taküm samar aser lendong ajurur kibong den sünep o shia teyari balala agütsüba osang ajanga angazüker.

Mokokchung Town Lanur Telongjem-i asükhu lemsar

Dimapur, July 29, 2026 (TYO): July 28, 2026 anepdang Penli Ward nung Sangtam nunger kaketshir ana taküm samaba osang angashia temulung raksar ta Mokokchung Town Lanur Telongjem (MTLT)-i metetdaktüsügo.

"Iba lendong nung Queen Mary Higher Secondary School nung kaketshir ana- asür Muwalong Sangtam aser asür Thridiba Sangtam na asüba atema temulung raksar. Onoki tasür

kibong den asükhu lemsateper aser temulung zürepba mapang Tsüngremi tashi aser tesünep agüjang ta sarasademtsür" ta MTLT-isa metetdaktüsü.

Lanur taküm ana samaba ya Sangtam nunger asoshi dang masü saka Mokokchung nung alirtem asoshi takoksa tulu lir. Asenok kin balala süaka Naga kibong ka nungi dang lir aser adianu tesentaktep agi longjema lir, anungji onoki nenok den külemi mangyimer, ta MTLT-isa ashi.

Noklangsangba GHS ki tasen yanglutsü ayongzüker: JKM



Dimapur, Chiteni/July 29 (TYO): Mokokchung district kübok Lirmen yimdak July 19, 2026 nü alinen tesashi aluba ajanga Noklangsangba Government High School kanga mejungi raksar aliba asadangtsü atema Japukong Kaketshir Mungdang (JKM) tiri anir ketdangsürtemi July 27, 2026 nü iba tesem semdanga liasü.

Iba mapang parnoki Lirmen Village Council den senden ka mena alinen agi kongshiba indang

hembu aser kaketshirtem kaket shisatsü angazütsü atema tesem tajungba bushitsü indanga jembia liasü ta JKM sangdong ka ajanga ashi.

Alinen aluba ajanga kasa tesem nung school agitsü tamakoktsü kumogo ta parnoki asatet aser ano ali anenzüka aotsü ama aliba ajanga kaketshir, tesayur aser staff tem maneni iba school kidang arua anisüngzüka mener kaket shisatsü angazütsü aser sayutsü tasak ta parnoki

ajiteta liasü, ta ashi.

Tang aliba tesem nung maneni shisaluyimba nung lendong lir aser meyi sodi tatemleni arur, aser khen atema mera agiaka school ki tasen tekeraba nung yanglutsü nüngdaker.

Anungji sorkar aser tim ketdangsür tem dang tensa majungba ajiteta akok tashi tekeraba nung school ki tasen ka yanglutsü atema mera agitsü ajungshir, ta JKM-i ashi.

NEZCC Young Talent Artistes Award 2026-27 atema application meshir

Dimapur, Chiteni/July 29 (TYO): North East Zone Cultural Centre (NEZCC), Ministry of Culture, Government of India ajanga North Eastern states ti nung 'young artistes' aser 'artisans' tem nungi Young Talent Artistes Award 2026-27 atema application meshir, ta Directorate of Art and Culture, Nagaland ajanga sangdong ka nung metetdaksü.

Iba sempet ya Folk and Tribal Music, Ken aser Tsüngsang, Theatre, Jilushi, Mime, Painting, Wood, Cane and Bamboo Crafts, Traditional Handloom

and Handicrafts, Chipu yangluba aser tanga traditional art forms nung takotet candidates tem asoshi alitsü.

Applicants ya Indian senso aser Arunachal Pradesh, Assam, Manipur, Meghalaya, Mizoram, Nagaland, Sikkim mesüra Tripura lisopur, aser March 31, 2026 tashinung arishi küm 18 aser 30 tsüngta asütsüla. Kasa wadang nug taoba mapang State mesüra National awards ngur alirtem iba award asoshi metemsü.

Sempet nungya sen 20,000 den kulizüng kaket den memento

dena alitsü.

Application forms ya state shia Directorate of Art and Culture/Cultural Affairs, Shilpgram, Panjabari, Guwahati, Dimapur nung NEZCC Headquarters nungi angutsü mesüra NEZCC website <https://nezccindia.org.in> /Home/ Advertisement nungi download sütettsü.

State Departments temi applications ya screen sür teshimtet applications kar NEZCC dangi August 31, 2026 tashinung yoktsü, ta sangdong ajangasa ashi.

Kohima nung MO tasentem atema orientation sentong agi



Dimapur, Chiteni/July 29 (TYO): Nagaland Public Service Commission (NPSC) ajanga tasen shimba Medical Officers atema orientation sentong ka July 28, 2026 nü Conference Hall, Directorate of Health & Family Welfare, Kohima nung agia liasü.

Mapa nung aniokba session ya Dr. Menguzenuo Margaret Yhome, Director (Health) menden sür agia liasü, kong

Principal Director, Dr. Mereninla Senlem-i iba sentong ayongzüka nukjidadong lemsatepa liasü.

Iba session sülen technical session ka agiba mapang office inyakyim, talisa general rules, leave rules aser admissibility, PIMS, APAR file amshiba yimyatem Kegwachu Tep, Deputy Secretary H&FW ajanga lemsatepa liasü.

Peter Swu, Senior Accounts Officer ajanga "Basic account

matters" onük nung ajemdaker jembidang charge report, pay slip, NPS aser increments indang awajema jembia liasü.

Tesüsa Directorate, NHM/NSACS/NQAS küboki aitba National Programs indang Program Officers indang presentation agüja liasü.

Sentong tembanga Dr. Puse Liegise, Director (M.E) DHFW ajanga melepzüng o jembia liasü.

EDTC-i Residential Sanitation Fees menoktsü metetdaksür

Dimapur, Chiteni/July 29 (TYO): East Dimapur Town Council (EDTC) kübok aiben lephsia aser maneni sanitation service agüja aruaka ward kari tang tashi Residential Sanitation Fees memonoki lir. Sanitation service mapang shidak nung agüjaka aikati latetja aliba sanitation fees magütsür, koba tebilemtsü tulu lir, ta EDTC sangdong ka ajanga ashi.

Iba amaji senzuka yutsüba ajanga Council-i sanitation services anepalua agütsütsü merangba nung timtem ajurur.

Anungji, Residential Sanitation Fee magütsü aliba

nüburtem ajunga dang pei tagütsütsü tim tekeraba nung agütsütsü metetdaksür. Mapang shidak nung magütsüra, East Dimapur Town Council-i aibelenba ki mesüra ward nem sanitation services magütsütsü, ta sangdong ajanga ashi.

Sanitation fee magütsüba ajanga sanitation service anenba nungi timtem adokra, ibaji EDTC khuret masütsü.

Anungji nisung ajaki iba sangdong ya züngzünga angaoka mapang shidak nung temonoktsü tim menoktsü ayongzüker, ta ashi.



Tuli aser Tzüdikong nung tzümetsüng aser anentsü agi timtem takoksa ajururtem yaritsü asoshi Langpangkong Development Board aser iba kübok Committe balala nung züngsemtem rongnung temulunger tenla saruba sen lakh 1.55 Langpangkong Tzükong Mungdang lenirtemi Tuli SDO (Civil), Wb.Nukshimatong, NCS nem agütsür külen parnok külemi agiba noksa ka yangi angur. Taküm 2026 küm asen lima nung tzünglu kanga aruba agi tesem aika nung tzümetsüng aser anentsü agi tesama, takoksa aser timtem tulu ajurudagi. Iba ama mapang nung yimten, arogo, lokti aser kija kibongtem aikati yaritepba angazüker. (Tuli, July 29,2026)

Niuland District Planning & Development Board senden menogo

Dimapur, Chiteni/July 29 (TYO): Niuland District Planning & Development Board (DPDB) senden July 28, 2026 nü Deputy Commissioner, Niuland indang Conference Hall nung Deputy Commissioner & Vice- Chairman DPDB, Niuland, T L Kiusumong Tikhir lenisüba kübok mena liasü.

Parnoki taoba DPDB senden nung lemteta aliba lepa reprangshiba mapang GHS Aghunag indang Multipurpose Hall cum Auditorium tsünbang yanglushitsü, Aghunaqa area nung lenmang aser apu tebilemtsü aliba indang jembia liasü.

Item timtem nung yaritsü asoshi Head of Departments ajungai sen 5,000 bendentsü parnoki telemtetba agia liasü aser temulunger temi iba dang timba bendentsü parnoki jembia. Iba sen bendentsü asoshi EAC Aghunaga, Border Magistrate nem nungloktsü aser iba sen ya August 15 tashinung bendenseptsü jembia liasü.

Iba sen bendena mapa inyakba osang taruba DPDB senden nung agütsütsü lemtet. PWD (R&B), Dimapur

Division ajanga Aghunaqa area nung lenmang tesendaktep indang osang tejangja lemsatep, koba Niuland district PWD (R&B) küboki aitba lenmangtem, tanga district lenmangtem, yimtsüng lenmang aser ali metenzüka aoba ajanga timtem ajuruba indang tejangja osang lemsatepa liasü.

Parnoki department dangi Nitozu-Pihokhu Road (6.00 Km) atema proposal den Concept Note aser DPR dener yoktsü lemtet.

Niuland Town Council indang chairman-i 4th Mile, New Showuba nungi Niuland tashi lenmang mejungi aliba indang tebilemtsü lemsatep. Iba sülen Deputy Commissioner-i Urban Development aser PWD (R&B) dang iba lenmang anepalutsü ajungshia liasü.

Board nung Ghaspani-1 A/C atema LADP 2026-27 kübok schemes balala indang jembia agizük.

DPO, Land Resources, V. Vikugha Sema ajanga department inyakyim osang tejangja PowerPoint presentation nung lemsatepa liasü.



Lucknow, July 29, 2026: Bodhbarnü Command Hospital (Central Command), Lucknow nung Defence Minister, Rajnath Singh-i video conferencing ajanga Department of Military Medicine tenzüksüdü tangokba noksa nung angur.

Lok Sabha senden nung Anti-Paper Leak Bill agizükogo

New Delhi, Chiteni/July 29 (Agencies): Bodhbarnü Lok Sabha senden nung Public Examinations (Prevention of Unfair Means) Amendment Bill, 2026 atema o entepba sülen iba bill agizükogo, ta ketdangsertemi metetdaksü.

Exam paper leak asüba aser exam dak sendakba ochimashi ken otem nung aibelenertem nem temerenshi tuluba agütsütsü, item ama ken o tekeraba nung bushisüngdangtsü aser mapang lateta yur ken otem angadangtsü atema iba ozüing yanglushi.

Lok Sabha nung Opposition lenir, Rahul Gandhi-i, Jantar Mantar nung longkak aiter kaketshirtem dak tashiyim amshibaji Union Home Minister Amit Shah ajanga lir, ta tai tongloksüba nungi rongrong adoka liasü.

Iba bill agizükba sülen anogo piyong atema Lok Sabha senden thinen.

Iba bill pusema Union Minister Jitendra Singh-i, iba ozüing yanglushiba ya ajanga Centre sorkari public exam teladak asütsü aser exam akhümket wazüka ayutsü atema kanga nendaka inyakba kuli sayur, ta metetdakja liasü.

Singh-i, 2024 küm anti-paper leak ozüing benokba sülen tang tashi nung FIR 52 benoka liasü, aser tesüba küm ishika tsüingda paper leak asüba dak sendakba nung kaketshirtem soseta asüba-a kanga ajema kümogo, ta metetdaksü.

Iba ozüing tasenba kübok ken otem ita asem tsüingda bentettsü,

mapang lateta yur ken o bushisüngdangtsü aser special task force ka tentettsü.

Iba ozüing kübok aibelenertem küm 10 tashi tepuokdak ayutsü aser senchi lakh 50 tashi achitsü. Tamalenbo iba ozüing kübok aibelenertem tepuokdak küm 5 tashi ayutsü aser senchi lakh 10 tashi achitsü lateta liasü.

Public Examinations (Prevention of Unfair Means) Amendment Bill, 2026 kübok aibelener 'service providers' dang senchi crore 5 tashi achitsü akok.

Iba dak alia exam ketdangsä agitsü aliba nung indokba senotsüji-a parnok dak (service providers) nungi alangzüksü, aser public examination ketdangsä agitsü atema küm 8 tashi temelaba magütsütsü.

2024 küm agizükba ozüing nungbo senchiji crore 1 tashi dang lir aser küm pezü tashi dang tatidang ketdangsä agitsü atema temelaba magütsütsü lateta liasü.

"Service provider" tetezü agency, organisation, tentet, associations, business entity, company, partnership mesüra single proprietorship firm asütsü akok, iba nungji associates, sub-contractors aser computer resource agütsürtem densema lir.

Bodhbarnü Rahul Gandhi-i, "Asen kaketshirtem dak injang khaloktsütsü atema home minister-i tetuyuba agütsü. Asen kaketshirtem azü nung pai injang khaloktsü. India nung

kaketshirtem dak injang khaloktsütsü atema pai tetuyuba agütsü," ta tai tongloksü.

Paisa, home minister kati shilem magiübo injang amshitsü temelaba magütsütsü, ta ashi.

Rahul Gandhi-i jembiba mapang nung Union Minister Kiren Rijiju-i aiben tiyongtsüü ia jembia liasü. Rijiju-isa Gandhi dang, nai jembiba oji metentsütsüsa kuli agüjang mesüra nai tai tongloksüba jameyipa agiang, ta ashi.

Rijiju-i Rahul Gandhi dang, "Kechiba nai iba ama oji jembir? Iba ama tai tuluka tongloksüba ya nai angateta lir ma? Rahul, iba yabo süoki ia agitsüla. Nai tatok meshitsüsa akümtsü. Nai nü oji jangjashijang mesüra meyipa agiang. Yimlibilema yamaji tejembi. Nai jembiba oji khenyongi tai," ta metetdakja liasü.

Sorkari Hombarnü mezüing Public Examinations (Prevention of Unfair Means) Amendment Bill, 2026 ya benoka liasü. Union Minister of State Jitendra Singh-i iba bill benokba mapang nung opposition züngsemtemi ola adoka yimiyim ayima liasü.

Opposition züngsemtemi tawa (July 20) kaketshirtemi Parliament tsütsüleni longkak aita aoba mapang nung police-i kaketshirtem dak rubber injang khaloktsüba densema police-i tashiyim amshiba atema sorkar dang nungi telangzüba meshiba nungi rongrong aiben adokogo.

CJP leniba nung kaketshirtemi anogo aika longkak aita aruba sülen Honibarnü education minister Dharmendra Pradhan-i menden nungi anenogo.

India nung school lakh 1 nungbo tesayur kaka dang lir

Nagaland nunga tesayur kaka dang aliba school 35 lir

New Delhi, July 29 (Agencies): India tesem balala nung aliba school lakh 1 dak tema nungbo tesayur kaka dang lir; Andhra Pradesh kija nung school 16,000 nung tesayur kaka dang lir, ta ketdangsertem osang ka ajanga metetdaksü.

2025-26 UDISE+data ajanga ashiba agi, India nung school 1,00,843 nungbo tesayur kaka dang lir, aser tesayur kaka dang aliba school teimtiba aliba state ji Andhra Pradesh (school 16,357) lir, iba sülen Jharkhand (9,827) aser Maharashtra (9,269) na lir.

Karnataka nunga school 8,042 nung tesayur kaka dang lir, Uttar Pradesh nung school 7,874, Rajasthan nung 7,200 aser West Bengal nunga school 6,769 nung tesayur kaka dang lir.

Telangana nunga tesayur kaka dang aliba school 4,793 lir, Tamil Nadu nung 3,957, Assam nung 3,159, Himachal Pradesh nung 3,128, Uttarakhand nung 2,655 aser Chhattisgarh nunga item ama school 2,461 lir.

Kerala nung tesayur kaka dang aliba school 67 lir, Nagaland nunga school 35 nung tesayur kaka dang lir, Sikkim

nunga 31, Ladakh nunga 28, Delhi nung tenet aser Andaman & Nicobar Islands nungbo tesayur kaka dang aliba school ka dang lir.

School tem nung tesayur menden tazüing aliba dak sendakba nung Rajya Sabha senden nung tasüingdangba ka langzüdang Minister of State for Education, Jayant Chaudhary-i item osang ya metetdakja liasü.

Tesayur menden tazüing aliba, mapa nung shimokba, service telatetbatem aser tesayurtem lemezüktsüba ya state sorkartem aser Union Territory administrations-i dang achaayanger, ta shia Education ministry-i tesayurtem kwi lemezükja ali mesüra menden kwi tazüing ali, iba dak sendakba nung state sasep nung telangzüba magütsü.

Education ministry-i, school tanur-tasayur national ratio ji primary level nung tanur 19 shia tesayur kaka, upper primary nung 17, secondary nung 15 aser higher secondary nung 23 lir, aser iba ya National Education Policy telatetbatem kübok lir, ta metetdaksü.



July 29, 2026 nü New Delhi nung German Ambassador to India, Philipp Ackermann aser External Affairs Minister, S Jaishankar na senden amendang tangokba noksa nung angur.

बैंक ऑफ महाराष्ट्र
Bank of Maharashtra
भारत सरकार का उद्यम
एक परिवार एक बैंक

GUWAHATI ZONAL OFFICE

1st Floor, Dwarka Center, Sani Ram Bora Path, Near Bora Service, Ulubari, G S Road, Guwahati- 781007, Phone: 0361 2458566, e-mail: legal_guw@bankofmaharashtra.bank.in

Sale notice for sale of immovable properties (Appendix - IV - A)

Securitisation and Reconstruction of Financial Assets and Enforcement of Security Interest Act, 2002 kübok kiojen ayoktsü atema E-Auction Sale Notice agütsür, Security Interest (Enforcement) Rules, 2002 kübok Rule 8 (6)-a züingang.

Public aser talisa sen apur/tem aser Guarantor/tem dang ya sangdonger, tsüinglanglen shia aliba Bank of Maharashtra dang mortgaged/charged süa aliba kiojen ya Bank of Maharashtra nung Authorised Officer-i agiadokogo, aser iba kiojen ya Bank of Maharashtra-i tsüinglanglen shia aliba sen apur/tem aser Guarantor/tem dang nungi table nung shia aliba ama sentsüh alangzüksü atema "Kong aliar yamaji", "Koma aliar yamaji", aser "Yangji aliba ajak" basis nung 31/08/2026 anogo nung ayoktsü. Sen apur/tem aser Guarantor/tem, sentsüh tagütsütsü aliba, kiojen osang tongmelang agi aser aser iba dak sendakba osang, possession type, reserve price aser earnest money deposit-a tsüinglanglen agütsür,

SL	Name of Borrower(s)	Amount Due	Short description of the immovable property with known encumbrances	Possession Type/ Reserve Price / Earnest Money Deposit
1	i. Ayozonuo ii. S Nzanbemo Lotha Branch: Dimapur	Rs. 35,72,392.00 (Rupees Thirty-Five Lakh Seventy-Two Thousand Three Hundred Ninety- Two Only) plus future interest as per applicable rate and other charges thereon w e f 12/05/2025 less recovery if any.	All the piece & parcel of residential building on land measuring 1264.21 Sq. Mtr. (13608 Sq. ft.) situated at Patta No. 682, Dag No. 228/1015, Mouza No. 03, located H/No 226(A), Ward-2, Naharbari, Dimapur, Nagaland-797112 in the name of Mr. S Nzanbemo Lotha S/O Lt. Rev. Samuel Ngullie.	Symbolic Possession Rs. 2,83,71,473/- (Rupees Two Crore Eighty-Three Lakh Seventy-One Thousand Four Hundred Seventy-Three Only) EMD: Rs. 28,37,148/- (Rupees Twenty-Eight Lakh Thirty- Seven Thousand One Hundred Forty-Eight Only)

Iba sale dak sendakba telatetbatem tejangja metettsü atema Bank indang website nung iba link <https://bankofmaharashtra.in/asset-for-sales-search> nung aser E-Bkray portal (<https://ebkray.in/eauction-psb>) nung repringang. Helpdesk Email: support.ebkray@psballiance.com, Contact No. +91 - 8291220220

Date: 28/07/2026
Place: Guwahati

Authorised Officer
Bank of Maharashtra, Guwahati Zone

Form No. 3
[See Regulation-13 (1)(a)]
DEBTS RECOVERY TRIBUNAL GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 343 / 2026
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No. 6423

BANK OF BARODA
- VS -
M/S. JIREH ENTERPRISE & Ors.

To,
(1) M/S. JIREH ENTERPRISE
A Proprietorship Firm, Represented by its Proprietor, Mr. Samuel Sumi, Son of Hewoto Sumi, Address: H. No. 447, Jireh Enclave, Block D, Daroga Pathar, 3rd Mile, P.O.: Dimapur, Dimapur, Nagaland- 797115.
(2) MR. SAMUEL SUMI
Son of Hewoto Sumi, Proprietor of M/s. Jireh Enterprise, Address: H. No. 447, Jireh Enclave, Block D, Daroga Pathar, 3rd Mile, P.O.: Dimapur, Near TATA Showroom, Dimapur, Nagaland- 797115.
(3) SMT. VICCASHE OTOLI SUMI
Wife of Samuel Sumi, Daughter of Viccasse Sumi, Address: H. No. 447, Jireh Enclave, Block D, Daroga Pathar, 3rd Mile, P.O.: Dimapur, Near TATA Showroom, Dimapur, Nagaland- 797115.

JAOKER
17-07-2026 nü Presiding Officer/Registrar matsüingdang **OA / 343 / 2026** benoka liasü.
Iba Act nung section 19(4) kübok application nung ajemdaker na abnema benoka (OA) sentsüh **Rs. 3,37,96,032.41** alangzüksü atema (application den documents etc. densema lir) Tribunal-i jaoker/ notice agütsür.
Iba Act nung section 19 kübok sub-section (4) nung ajemdaker na aser defendants dang teküboklen shia alibatam tuyur:-
(i) Iba case defend asürtemi tajaba agütsüba sülen anogo semer nü tsüingda relief asoshi mepishibaji kechiba magütsütsüla, iba kuliji sayutsü metetdaksür;
(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;
(iv) Security interest atema inyaksangshiba dak alaka Tribunal dang nungi jelia temelaba magi original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;
(v) Ordinary business ajanga secured assets mesüra tanga assets aser kiojen nungi yokzüka seni security interest soita aliba bank mesüra financial institutions indang account nung deposit asütsüla.
Nü dang tezüluba nung sangdong applicant nem agütsütsü tuyur aser **28-08-2026** anogo nung anepdang **10:30 ako** nung Registrar matsüingdangi arutsü tuyur, yamaji meinyakra application ji angadangtsü aser na meliaka telemetba agütsü.
Paper Book atema agüja aliba Url nung repringang: <https://cis.drt.gov.in/drtlive/paperbook.php?ri=2026467230615>
21.07.2026 anogo nung tsüinglanglen kü meyongnem den iba Tribunal indang seal agütsür.
Registrar /C
Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR THURSDAY, JULY (CHITENI) 30, 2026

Ita sen tenlar !

Assam nung ano takümsa tesashiba tzümetsüing agi nisungtem timtemdagi . Atangji, asenoka tzümetsüing aser anentsü agi tesama aser takoksa tulu ajurudagi, ajisüaka asenok takoksa aser timtem ajuruba ya Assam nungertemi ajuruba timtem takoksa den medemdangtsüla masü, panokbo yimtsüing aika tzü agi atsübangogo aser alua maka kümogo aser nisunga anarongdena kümzüktet nungji, kiset shirurutema meyrirjang aika samaogo. Ano, asenok asoshi tebilemtsü kaji, Assam tzümetsüing jagi asenoka kanga akoksatsü, kechiyong Assam nunger lu samabaji asenok lu samar amai lir aser Assam nunger kiset shiruru samabaja asenok meyong ak, an, nashi, nabong samar amai lir. Iba ama tesama tia nung, nübortem tawadakdak maka timtemba mapang, Assam government-i timtem ajurua aliba tesem ajakleni teyari yokba den külemi, ano MLA shiai tzümetsüing agi timtema alirtem asoshi ita ka sen tenlatsü nangzüktepba mapaji asenok asoshia tangazüksü mapa tajung ka asütsü. Atangji, Assam nungbo ano Assembly Secretariat nung inyaktertemia anogo ka sen tzümetsüing agi timtema alirtem asoshi tenla agütsütsü latetbaji Tsüngrem nem tenla agütsür amai asütsü. Asenok aikati tzümetsüing mengudang aser majurudang alitsüa akok, iba jagi tzümetsüing agi nisungtem timtem takoksa ajurubaji shishia mebilemtsüa akok. Ajisüaka , alima nung taküm lia ajuruba lendong timtem aser takoksa rongnung tulutibaji mi agi ki ajak rongdokba aser tzümetsüing agi kiojen aser alu samatsüba ya asütsü. Iba ama timtemba mapangbo tula tejen kata kanga nüngdaker aser chipo tejen tilakajia rongsen tulu ama akümer, anungji sen teraka agütsüabajia aika agütsü ama bilema agizüka amshir. Aji oda, alima lendongtsüdong, tzümetsüing ama agi tesama tulu ajurur alidangbo ozü kinunger, par kinunger ta masü mesüra ozü yimer par yimer ta ka masü aser ozü kin par kin ta a masü, saka alima lendong mapangbo kin ana dang lir, timtem ajuruba kin aser timtem majuruba kin. Iba amaji alima lendong agi timtem tesama ajurur aliba mapangbo yimtsünga ana dang lir, timtem ajuruba yim aser timtem majuruba yim. Anungji, timtem lendong majuruba kin aser yim jagi timtem ajurua aliba kin aser yimji yaritsüla, kechiyong anema yutsüba purtemji shiranger yaritsü asoshi yutsüba purtem lir. Ibaji kodang asenoki angatetdir, asenoki timtem takoksa ajurur alirtem nem teyari tilaka magütsüiang melitetsü. Aji oda, timtem lendong ajuruba kinji asenok masü süra timtem lendong ajurur alirtem nemji asenoki anir Assam nunger amaji kari ita ka sen aser karibo anogo ka sen ta agütsüra, timtem takoksa ajurur alirtem asoshi dang masü saka tenla agütsürtem asoshia tejashi madak tepela aser takoksa madak takok anguba anogoji iba tenla agütsüba anogoji asütsü. Nisungtem timtem takoksa ajuruba mapang ya timtem takoksa majurui alirtem asoshi temeim lemsateptsü mapang tajung lir. Ashiko, asenok ama tamashi nisungtemibo tang ama lendong mapang nunga timtem takoksa ajurur alirtem tenüng nung teyari lenmang tapu balala bushia agitsüang bilema alitsüa akok. Ajisüaka, asenok ket nung timtemer yaritsü tashi alidang, asenoki anogo ka sen agidanga timtemertemji meyaritetra, ashiko, asüngbo meyipar tangariang asen yaritsüsa tensa mapang agi meneptsüa akok. Atangji, kari peiang machi aser magi timtemer yarir saka karibo timtemer meyonga dena chitsür ta asüba lima nung asenok alir. Naia koba jangrar ? Tang ya asenok nisung shiai peii jangraba shimtettsü asoshi tatidang tasak ka agütsür amai asenoki bilemdi . Iba tatidang nung asenok ajak 'pass' asütsü merangdi.

OLEMSABANG

WORLD WAR-III TENZÜKOGO

~ T.S. Jamir

Laishiba ya Lipok nungi Jungkai Adok tashi zülua aliba ama ajak nung shidak ta asüba khuli jenti lir. Lai tapu magütsür kechiaser ajaki laiji temezüng nung janga kar. Aji oda lipoker mapang nungi lai-o ataloka aru, ano tang-a tatalokdak aser aji alima raraji Russia-i anitsü ta zülua aliba ama tang atalokdagi. Alinük tesem aisü nung rara adoka lir aser aji manenteter. Yeremia 51:27-29 nung shia aliba ano ana anünga lir; kaji Isaiah 4:1 nung koba shia lir, iba raraji küm 300 jungna-a raratsü ta ni bilemer. Tsüngrem O ya logic aser ongkho agi sünga lir; iba dangji Tsüngremer yongsük yakjang züngdangba alitsü. Ya Daniel kaket nung tiemba zülua lir. Kümzüng yongsükji yamai: Nebukadnezzar-i pongmang aser pongmangji Daniel-i ratetsüba ama süngyanglo tokolak nungi shir tanü putu tashi nung yimlitem shia küm kwi agia aru aji asenoki Google nung mel-mela-a angutsü. Aji oda Yisu arur küm 3000 ajungtsü küm lir(40) shi dang anünga lir aser kobi meli-i teburtem sümatsü aser iba süllen tetsüri yimsü asütsü tenzüksü. Idangji Isaiah 4:1 nung zülua aliba ama ataloktsü.

Iba süllenji Rapture arutsü aser Tsüngremer yongsük küm 7 rishikangshi nung alitsü. Iba süir küllen Tsüngremer yongsük 666 ji ataloktsü, Israel nunger küm 400 Egypt nung ali aser parnok adokdang küm 40 agia liasü; iba mesük Jungkaiadok kaket nung jangzü 7, marok 7; ajakji Tsüngremer yongsük ongkho lir. Anungji Tsüngrem O-i ashiba ama shiba nem tangatetsü agüja lir, pai angatetang. Küm ishika nung tang telidak purtem ya sümatsü aser asen semchisemnurtem aya-tsüra agi asütsü, injang-bomb agi asütsü, kar nuclear bomb agi asütsü aser aika kahpeter mesüra letpeter okrongseta alitsü. Zülua aliba ama Rapture jia ataloktsü aser alima tatsük agi yimsa-a aotsü ta shia aliba ama küm nungi küm tatsükba küma odar.

Asen nüburtem ya Yisu aru yongya-a drama yia atateper; talisa tamangertemji ayir ter(10) milen bener kiyir lenji aoba mesüka alitsü. Tanela temeshi agi sünga alirtem Yisu arudang ayipa atutsüpurtem ta ashitsü akok, saka tanüngba temji, missionary-ba nungi tenzüker Tsüngrem lar tashi tamashir milen nung toztü maliba pur amato atatsü. Kiyimsangji menua maru nung parnok ajak anünü aser amoa ao. Süra asenoka shisa kar pungo rongnungji atentsü asü shisamakar pungo rong nung atentsü ken shisadangdi. Saka teyimla kaji; rapture masüdang tanaben sor asürtembo ajak kodaki atutsü. Ninive nunger aser anüolentip chubatsur(Egypt) dena kodak nung lir aser Obendangba anogoji lai asenok aitsütsü.

Kari, asenok ajak asütsüsaji kechi ali ta ashitsü akok. Shidakba nung asütsüba aser onbendangba nungji asenok ajak adentsü; alima nung super power linük lenirtem Trump, Putin, Modi, Kim Jung, amala ajak alitsü. Saka iba mapang asenok Yisu dak amangertembo tanüla kümzüker atar asü masü aji dang ntontipang. Taküm January 30 2026 nikongdangtu Yisu arur asübo Aor tiemba ka kodaki oer lila. Iba anogo amato dang asenok ajak teti tanüla nung renemshir alitsü nüngdaker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manila nung Arise Asia 2026 Congress senden tenzükogo



July 27, 2026 aonung Manila nung Arise Asia 2026 Congress tetenzük sentong nung tangokba noksa nung angur.

July 29, 2026: July 27, 2026 aonung Manila nung Arise Asia 2026 Congress tenzükogo; iba sentong nung Asia tesem balala nungi Khristan 4,000 shi adener.

Anogo pongunü senden nung kaketshirtem aser lanurtemi frontier missions aser Khrista osangtajung prokba wadang atema jembi tenzükogo.

Arise Asia ya "For the Joy," omen nung ajemdaker agir. Iba omen ya Ibri 12:2 nungi agizükba lir.

Philippines Council of Evangelical Churches National Director aser Arise Asia board nung chairman,

Noel Pantoja-i iba senden tenzükja jembidang mission dak sendakba tayongzükba balala metetdaksü.

Pantoja-i, telok 7,000 shi nungin nisung billion 3, mesüra alima nung nütüsung shilem 40-ibo Khrista osangtajung junga mangashidang, ta metetdaksü.

"Khrista osangtajung agi mayimjemba telok teimtibaji iba region (Asia) nung lir. Talisa South Asia, Middle East aser Southeast Asia nung alirtem aikati Khrista o s a n g t a j u n g nung adentsü atema melamela aruogo, ajisüaka aikati timtem jenti agia aruogo- karbo tayimtsü nung ghonda aika amenba

linük mesüra organization sasep nung dang masü saka iba dak alia Khrista osangtajung prokba nung shilem agitsüla, ta ayongzük.

"Lanur meyrjang aikati Tsüngremer agent tem aser ambassadors ama apusoa item kintem dangi osangtajung bener aotsü atema sarasademang," ta pai ashi.

Arise Asia Executive Director, Rev. Dr. David Ro-i, iba senden nung adenertem karbo iba senden nung adentsü atema melamela aruogo, ajisüaka aikati timtem jenti agia aruogo- karbo tayimtsü nung ghonda aika amenba

sülen ang iba tesem atong, karbo tayimtsü anendak mapang talangka anendaka liasü aser aikati timtem balala ajangshiogo; ajisüaka item ajakji mission lenmang nung jajatsü atema renemshiba dang lir, ta ashi.

Rev. Ro-i, "Nü jakdang lenmangji tezübabo masütsü. Kibuba nung tepelaji melamelabo mangutsü. Ibri tapu 12 bilemteter asü? Kangki aremtsüla," ta ashi.

Ro-i, anogo pongunü Congress nung tepela balala shisadangtsü; mezüngbuba anogo omenji tepela atema asütsü, tanünübuba omenji Yisu sülen anidakba tepela asütsü, tasemnübubaji bendanga agütsüba tepela, pezünübuba omenji akanga nokdakba tepela asütsü aser tatemnübuba omenji teti atema tepela asütsü, ta metetdaksü.

Nikongdang Tsüngrem O jembidang Philippines nung Christ's Commission Fellowship (CCF) nung tongti pastor, Peter Tan-Chi-i, tepela nung Tsüngrem tenzükang aser wadang junga renemang, ta ayongzüka liasü.

Peter Tan-Chi-i, Khristan lenirtem shilem 25-i dang tatem tashi Tsüngrem tenzüka alizüng tonga metetdaksü.

asemteter, ta metetdaksü.

Paisa, "Lenirtem aika tesülen atsüngzüka aoba kulitemji- Tsüngrem den mapang indoktsü sendokba aser atsüapong den arlla meytutetba ajanga lir," ta ashi.

2 Timoti 2:15 nung ajemdaker pai, "Tepela nung Tsüngrem tenzüktsü aser alizüng tonga asemtsü atema tajemdakdak asem lir. Mezüngbuba nung, ajak dang alia Tsüngrem peladaksütsü jangraba lir. Tanabubaji, tajungtiba inyaksü jangraba aser tasembubaji Tsüngremer ochi atema jangraba lir, aser ibaji ajanga dang ochi nung tesayuba agütsütsü atema tasü itdaksür," ta metetdaksü.

Paisa, "Nai kechisa inyakdir inyakaka, nisung peladaksütsü atema masü saka Kibuba peladaksütsü atema inyakang," ta ayongzük.

"Tsüngremi nü dang alizüng tonga asemtsü tuyur. Tepela nung Tsüngrem tenzükang. Alizüng tonga asemang. Iba tetezü na kodanga malangtsü ta masü. Iba tetezü na kodanga meyrutsü ta masü, ajisüaka nai nokdaksü," ta paisa metetdaksü.

ANOGO ABEN TSÜNGREM DEN

TAOCHI BENSHIRTEM TEMOATSÜBA

"Shiri taochi mapa sayur parnok temoatsüba, kechiaser parnoki taochi angutsü." (Mat. 5:7)

Asenok ajaki aria bilemtsüba aser aochia bilemtsüba yabo aginür 'pai kü dang tai tokogo', 'sentsüh aliba par-i ozü dang tokogo', 'ni koda masüba mapang pai yimli sayuogo'. Yamaji tanü tashi asenok ajak iba toachi nung Tsüngemi kümzüka anir arudar.

Yisui kechiba tenem nungi sayutsüngi dang pi dang aochitsü indang jembi? Kechiaser Yihuda nunger yimsü nung keta asenertemi pi dang taochi sayubaji ozüng nung maket ama, mesüra parnok sentsü rema aor ama bilem südi. Anungji pi dang aria bilemba aser aochiba nung parnok kanga anünga liasü. Luk 10: 25-37 nung yirur aliba nisung ka dak putir aser Levi nungba tenadi aochia bilemba maliasü.

Asenok ajak Tsüngremi taochi sayuba takümtem lir, süra asenoki tangar dang taochi mesayutsüji kuli kecha maka. Saka Yisui ashi, shiri toachi mapa sayur parnok danga Tsüngremi taochi sayutsü. Tangar dang taochi sayutetba nisungtemji Tsüngrem taochi angatetbapurtem lir. Ano pi dang aochirtemji temulung temerük alirtem lir. Saka shir dak shisatsü temerük mali parnoki pi dang taochi sayutsü memulunger. Pi dang taochi sayutetbaji na ne sasa kotaki atutsü apu yanglurba dang. Anungji akok tashi pi dang taochi sayutsü merangdi.

SARASADEM:

Kibuba Yisu nai kü dang taochi sayuba ama nia pi dang taochi sayutsü angazükdaksü nung ne dang pelar. Amen

Madhya Pradesh nung pastor 6 den Khristan ka jail nung puokogo

July 29, 2026: Küm ana tejaklen Madhya Pradesh nung tanur asoba benjung ka nung pastor trok den Khristan ka nem tai tongloktsüba sülen tawa parnok ajak aija küm pongu tepuokdak ayutsü atema obendang agütsüogo.

Küm ana tejaklen anti-conversion ozüng kübok parnok nem tai tonglokja liasü aser taoba ita (June 12) parnok ajak iba ken o nung aitsüba sülen tepuokdak puokogo.

Khristanem jagi tsükchiteptsü ajungshi, tesempa prok aser yimsü balala amangertem tsüngda tesünep raksatsütsü atema inyakogo, ta parnok aitsü.

Khristan kati, "Tiyazü ken o nung pastor trok aitsüba ajanga tsükchirtemi tesem trok nung Tenla ki shibangtsütetogo aser tamangertem melungjang nung tetsübu aitdaksüogo," ta ashi.

Arrshi küm 21 pastor Santosh Paraste, pastor Sanjay Markam (20),

pastor Amit Kumar (24), pastor Pramod Singh (28), pastor Karan Singh Maravi (40) aser pastor Chhot Singh Dhurve (49) nunger ajak ya Diwari yim nungi lir aser parnok ajak yim balala nung pastor inyaker. Parnok den külemi Pipariya yimdak nungi Khristan Jeet Singh (48)- a police-i pua liasü.

2024 küm pastor temji tanur asoba party ka nung adenba mapang nung kiyonger, Angad Singh Maravi-i parnok anema ken o agütsüba nung ajemdaker parnok pua liasü.

June 12, 2026 nü Second Additional Sessions Judge, Dindori (M.P), Justice Shiv Kumar Kaushal-i pastor trok den Khristan kaji küm pongu tepuokdak ayutsü atema obendang agütsü aser senchi 100,000 achi.

Iba ken o ya mezüng 2024 küm April 28 nü benoka liasü aser küm ana lir sülen ang parnok ajak iba ken o nung aitsür.

2024 küm April 28 nü pastor trokji apu aser

anogo ka lir Jeet Singh-a apu.

2024 küm May 6 nü Pastor Kumar aser Jeet Singh na bail nung chiok. Iba sülen anogo asemnü dang lir May 9 nü tanüngba pastor tem-Paraste, Markam, Singh, Maravi aser Dhurve nunger chioka liasü.

Kasa kümji December 31 nü police-i ken o benok aser 2025 küm November 26 nü court nung ken o benoka liasü.

Pastor trokprongla ya training agiba pastor tem lir aser yimtsüng balala nung aliba Arogotem nung pastor teinyakdak liasü.

Khristan lenir, Rakesh Rajdwar-i, "Pastor temji bail nung anizüktsü koka lir, ajisüaka bail atema sen 700,000 agütsütsüsa akümer. Parnok ajak sensaker kibongtem lir, anungji parnok bail nung anizüktsüji tasak asütsü," ta metetdaksü.

"Ajisüaka kodang sen ngudir onoki parnok ajak bail nung anizüktsü atema inyaktsü," ta paisa shisem.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züko


(n) etsük den külemi ayuba zü (fermented solid bamboo shoot)

* Shi den asoba züko kanga junga achir.

Zükoktsü

(v) süng agi atep (strike by stick)

* Police-temi longkak aiterem dak zükoktsü.

OLONG PAITEP # 7582**TIPIEN**

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN


1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7581 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük, 11. Teronem,
12. Sempa, 13. Jahaz.

NAI-A YA METETTER

Airbus A350-1000ULR flight test aircraft ajanga alima otsü tasen ka yangluogo aser iba ya commercial aircraft kati "world record for distance flown" lir. Iba Airbus ajanga 12,460 Nautical Miles (23,075.92 km) yima senzütetba ajanga 2005 küm nungi Boeing 777-200LR-i otsü yanglua aliba ajatetogo.

Airbus A350-1000ULR ya Qantas' Project Sunrise flights atema yangluba lir.

Pradyot-i TTAADC reforms committee tentetba metetdaksür

Agartala, July 29, 2026

(Agencies): Tipra Motha Party founder Pradyot Kishore Debbarma-i Tripura Tribal Areas Autonomous District Council (TTAADC) nung reforms committee tentetba metetdaksüogo.

Ozüing alema nisung shinga meshimoktsü aser Centre den Tiprasa Accord jembi tenzüktsü ta Debbarma-i ashi.

"TTAADC nung ozüing alema mapa ka danga magütsütsü. Inyakyim tasentem sülen anidaksü. Reforms

committee ajanga temelenshi bener arutsü saka ajakibo magizükttetsü akok" ta pai ashi.

Iba reforms committee nung lanur entrepreneurs, artists, writers aser lanurtem adentsü ta paisa ashi.

India sorkari Tiprasa Accord atema olemtep tenzükshitsüla. TTAADC elections agir joko ita pezü süir ta Debbarma-isa ashi.

"Tiprasa Accord olemtep tenzükshitsüla. Onoki India sorkar anema menokdaker, onoki tarutsü putu atema inyaker" ta pai ashi.

TTAADC recruitment nung tim masüba lir ta tai tongloktsüba atema Debbarma-i ashiba agi pai district council administration dang recruitment examination ajunga athitsü tetuyuba agütsüogo.

"Tangar nem asenok mezüingmeshi mesüdaksünür. Tim masüba ken o tem lira examination ajunga athitsüla" ta pai ashi.

Taküm April ita 2026 TTAADC elections nung Debbarmar'er Tipra Motha party-i takok tulu ngua liasü.

Tripura Police-i DGP asüba ken o atema SIT ulushir

Agartala, July 29, 2026

(Agencies): Tripura nung Director General of Police (DGP) Anurag Dhankar asüba bushisüngdangtsü atema tentetba Special Investigation Team (SIT) ulushio.

Tripura Police-i züingsem 3-i akümba SIT nung ano ketdangsür 7 bendenlokogo. Opposition party temi iba tatalokba atema judicial inquiry asütsü rongshiba sülen SIT ulushio.

Superintendent of Police (West Tripura) Namit Pathak-i maneni SIT ketdangsütsü ta Director General of Police office ajanga metetdaksü.

July 20 nü taoba DGP Dhankar taittsü keta sür lia anguba sülen July 20, 2026 nü

West Agartala Police Station nung ken o ka benoka liasü.

SIT ulushiba nung Additional Superintendent of Police Dhruba Nath, Sub-Inspector Subhojit Deb, Cyber Crime Unit ketdangsürtem, Amtali, West Agartala Women, Battala aser Ramnagar police stations nungi personnels aser KTD Singh Police Training Academy nungi instructor ka züingsemogo.

SIT-i iba tatalokba jungjunga bushisüngdang asütsü aser mapang shia Inspector General of Police (Law and Order) nem osang sangoktsütsü metetdaksüogo.

1994-batch IPS officer Dhankar ya Agartala nung pa indang office chamber

metsümeshidak sür lia angu.

Tripura nung opposition party temi judicial probe balaka asütsü akhangba mapang SIT ulushio.

CPI(M)-i Governor Indrasena Reddy Nallu nem a memorandum ka agütsüba nung High Court judge ka lenisüba kübok bushisüngdang asütsü takhangba agütsüogo.

Congress-ia police investigation nung ashishiteper aser judicial inquiry asütsü akhanger.

Tang tashi nung Tripura sorkari judicial investigation indang osang kecha memetetdaksü aser state police ajanga tentetba SIT-i bushisüngdanga arudar ta dang ashir.

Assam nungi Bhutan-i Purabi ice cream bener yok

Guwahati, July 29, 2026

(Agencies): Assam nungi Bhutan-i mezüingbuba dairy products bener yokogo aser iba ya Chief Minister Himanta Biswa Sarma-i apusoa yok.

Purabi ice cream 5,627 litres tashi Bhutan-i bener yok aser iba ya West Assam Milk Producers' Cooperative Union Limited (WAMUL) ajanga yanglu aser North East Dairy and Foods Limited (NEDFL) ajanga shishilembar.

Bhutan kübok Thimphu, Paro, Phuentsholing aser Wangdue dena tongti jilatem nung Purabi ice cream ayoktsü.

Assam-i milk-producing state ka nungi value-added dairy

products producer akümba ajanga international markets lapoker ta ketdangsürtemi ashi.

Assam kübok dairy cooperative societies balala nungi mamatzü bendener Purabi ice cream yanglu aser iba nung local milk producers meyrjang aika dena lir.

"Iba mapa ajanga Assam nung dairy industry tejakleni aoba sayur aser dairy farmers o cooperative societies asoshi maongka tasentem bentsür arutsü" ta CM Sarma-i ashi.

Sorkari value addition aser market expansion nung temulung agütsüba ajanga Assam nung agricultural aser dairy products yarir aser

domestic o overseas markets lenmang lapoker ta pai ashi.

Union Ministry of Commerce and Industry kübok Agricultural and Processed Food Products Export Development Authority (APEDA) ajanga NEDFL den export nung yaritepa liasü.

Tang mezüing atema yokba ice cream nung cups, family packs, cones aser gallon packs dena lir.

"Iba mapa ajanga Assam nung dairy cooperative network tashi sayur aser pack shiaji state nung dairy farmers ajanga agütsüba mamatzü amshia yanglu" ta Cooperation Minister & NEDFL Chairman Kaushik Rai-ia ashi.

USaserSaudiinatiIraqnungIranendsendaktepaalibatelokamak

Dubai, Chiteni/July 29 (Agencies): United States aser Saudi Arabia nati Bodhbarnü Iraq nung Iran den sendaktepa aliba teloktem makogo. US tir Donald Trump-i taoba hopta Iran amakba anenba sülen tang mezüngbuba Middle East nung anüing ajanga tesem kar makogo.

Kasa mapang nung Strait of Hormuz külemi ketdang asütsü atema Oman-i sentong ka lemsatepba Iran-i magizük aser ashiba agi, parnoki iba strait nung rong tem makogo aser Jordan nung US indang base ka makogo.

Tang asendenshir raraba den sensaksem takok monugtetba sülen taoba hopta sülen tang mezüngbuba totzü jenjang timba kümogo aser rara tangsa tangbo anentsü timla magütsür, koba US aser Israel nati February ita tenzüka liasü.

Iraq nungertemi northern Iraq kübok Mosul nung mozüki ka nungi tasü mangtem bener aoba mapang Shi'ite sectarian yimyim aser "Death to America!" yimyim ayima aoba video Iraq indang Al-Ahad television-i sayuogo.

Washington aser Riyadh nati külem sangdong ka ajanga, parnoki Iraq nungi Saudi totzü dak rangloker drone yoka makdaksüba atema telangzüba agüja Iraq nung Iran-i teyari agütsüba teloktem makogo, ta ashi.

Iraq nung Popular Mobilisation Forces-i ashiba agi, US aser Saudi nati Iraq kübok base balala amakba mapang parnok züngsem 20 tepsetogo aser 32 yirutsüogo. Iba telok ya Iran-i teyari agütsüba paramilitary telok ka lir.

Toba Hokolbarnü sülen tang mezüngbuba U.S. military-i Middle East nung tongtibang jenjang ka agiogo. Anogo 13 atonga Iran amakba sülen Trump-i taoba Hokolbarnü iba inyakyim anentsü tetuyuba

agüja liasü.

Rara tenzüker tang mezüngbuba United States den külemi tesem ka amakba nung shilem agiba Saudi Arabia-i yimjak nung nangzükogo. Linük ana senteper tang Iraq amakba ajanga Sunni Muslim Saudi Arabia ya Iran indang Shi'ite proxie tem den rara adokdakja rara tuluba kümdaktsütsü ta bilemer.

Iraq nung Shi'ite-i aniba sorkar ya Tehran aser Washington naprongla den military aser diplomatic tsendaktep tajung aliba linük isihka rongnung ka lir, aser parnoki jongdak senden ka ayongzükogo.

Washington-i, Baghdad nung sorkar dang Iran-i teyari agütsüba paramilitary tem anema jenjang agitsü ayongzükogo, saka item teloktem anema jenjang agitsüba merangba mapang linük nung mepetmesü adoka aruogo.

Iran aser Iraq na ya alima nung Shi'ite nunger timba aliba linük ana lir, aser linük ana tsendaktep tajung aliba ya iba hopta Iran nunger temeshi aine aoer meyirejang aikati annual holiday atema arrtsü ajanger Iraq nung oa shrine tem semdangba ajanga sayur.

Temeshi ainei aoertem karibo taoba Iran lenir Ayatollah Ali Khamenei indang noksa bener senzüa liasü. Khamenei ya linük anaprongla nung temaba jenjang nung aliba cleric ka ta züingshir.

Saudi Arabia pur ano tanga tesem ka nung rara tenzüker lir. Yemen nung Iran den sendaktepaba aliba Houthi teloki taoba hopta Temerem tzüyim ajanga Saudi indang totzü shibelen mesüdaktsütsü atema tenokdangba agütsüba den rong aser totzü facility balala amakba sülen Saudi pur tanga tesem ka nung rara tenzükogo.

Saudi Arabia den külemi Iran

mamak tsüingda ghonda ishika lia U.S. military-i, parnok indang air defence temi Middle East nung Iran-i US nunger sepaitem amakba nokdangtetogo, ta ashi.

Jordan military-i ashiba agi, parnok indang air defence temi Iran-i yokba missile pongu khazüka yokogo. Iba ita US nunger sepai pezü tepsetba rongnung asemba Jordan nung tepseta liasü, kong US indang base ya Iran-i aiben maka arudar.

Kasa mapang nung Iran Revolutionary Guards-i ashiba agi, parnoki Jordan nung US military amendaka aliba tesemtem dak ballistic missile aika khaloktsüogo aser Strait of Hormuz nung temelaba magütsüi aliba tesem ajanga aotsü meranga aliba totzü abenba rong asem makogo.

U.S. aser Iran na June ita tenangzüktepba yangluba Strait of Hormuz dak sendakba nung chirepba sülen rara tenzükshia liasü. Iba tzü lenmang ya alima nung energy shipping lenmang tongtibangtiba lir, koba Iran-i ashiba agi parnoki azüoker aser taah agitsü nükjidong lir.

Oman-i iba hopta iba strait külemi azüoktsü asoshi sentong ka benokogo, kong voluntary service charges agütsüdaktsütsüba benoka lir. Ajisüaka Iran nunger ketdangsür tejen kati Bodhbarnü Reuters dang ashiba agi, Oman-i benokba sentong ya Iran-i magizüker.

Ketdangsür yagisa, Oman den iba tesem 50-50 azüokba ajanga Iran tejangraba mataloktsü, ajisüaka Iran-i Oman ya kanga dang tongtibang kidanger ka ta agizüker, ta ashi. Iran-i rongtem aítba ajak azüoker aser strait toktsür aoba rongtema terabo azüokner.

United States-i, rongtem dang Iran anasa masü saka Oman tzüküm anasa lenmang amshitsü shia arutar.

AFFIDAVIT
(Name Clarification)

Regd No.275/26Date: 28.07.2026

I, Mr. Imolemba Longkumer, S/O Shri. Kilenmeren, age about 34 years, Permanent Resident of Ungma Village, Mokokchung, Nagaland, do hereby solemnly affirm and declare as follows:-

- That I am a bonafide citizen of India.
- That my name has been used in my educational qualifications until my Master's degree as Mr. Imolemba without my surname 'Longkumer'. My official documents such as Aadhaar, PAN, Bank passbook etc. has the same bearing.
- That while pursuing my Ph.D, I started using my surname 'Longkumer' in all official correspondences and as such, the name IMOLEMBA LONGKUMER is now my official name for all academic purposes.
- That I am known by the names **MR. IMOLEMBA** and **MR. IMOLEMBA LONGKUMER**. It is hereby clarified for all purposes that IMOLEMBA is my first name and LONGKUMER is my surname (family name). As such, the name IMOLEMBA and IMOLEMBA LONGKUMER are the names of one and the same person which is me.
- That I am executing this declaration to be submitted to the concerned authorities for clarification that the above mentioned names IMOLEMBA and IMOLEMBA LONGKUMER are of one and the same person. I further declare that I shall be known only as **'IMOLEMBA LONGKUMER'** for all purposes, correspondences, publications and official records/documents.

That the statements made herein above are true and correct to the best of my knowledge and belief and nothing has been concealed or false therein.
Solemnly affirmed and declared before me on this the 28th day of July, 2026 at KOHIMA, Nagaland.

DEPONENT
(Mr.IMOLEMBA LONGKUMER)

NOTARY PUBLICD-

Ukraine-i drones amshia Russia linük tesem balala amak

Kyiv, Chiteni/July 29 (Agencies): Ukraine-i Mongulbar aonung drones amshia Russia indang Perm, Ryazan aser Taganrog yimtitem nung totzü yangluba aser logistics facilities aser Crimean peninsula nung amak, aser Russia nung totzü timtiba ayoker Wildberries nung inyakertem Ryazan warehouse nungi ainshitsüsa akum.

Ukraine indang air defences ya Patriot missiles ama interceptors tem ajema akumer, anungji Russia-i ayong-ayonga maktettsüsa tensa ka nung lir, ajisüaka pari meta talang nung maktettsüsa drone yangluba ya Russia ajatetogo aser Russian oil refineries aser ki o jen nung makteter aser par time zones 11 nung totzü agi anünga akumer.

Tesüiba anogo ishika tsüngta drone amshia amakdang Wildberries warehouses tenet raksatsü, company indang totzü rizünga ayuba tashi shilem 10 shi raksatsüogo aser sapang balala ajanga osettsüset ayokba businesses tila meyirijang aika akoksar ta ashir.

Ukraine Tir Volodymyr Zelenskyy-i sangdong ka nung par sepaitemi Perm aser Ryazan nung oil refineries amak, Ryazan nung logistics

centre ka nunga kongshi, Rostov region nung export terminal aser military plant ka aser Crimea nung naval base ka nung amak, ta ashi.

Russian ketdangsür temia Ukraine-i amakba ya jangjatsüogo.

Moscow south tsütsü Ukraine ket nung aliba litsü nungi kilometer 500 shi pilar Ryazan indang Governor Pavel Malkov-i ashiba agi, industry aliba tesemtem nung mi adok aser nisung trok mozü kidang temang anepalutar. Wildberries-ia Ryazan nung par meyong tesem nungi ainshiogo aser osettsüset meshizükba mapa anena lir ta ashi.

Ukraine-i amakba nungi osettsüset kumzüka ayutsü mechi Wildberries-i kidanger Kazakhstan linük nung osettsüset rizünga ayuba tesem 100,000 square metres bushitar, ta Russian business daily Kommersant ajanga Bodhbarnü ashi.

Ukraine kübok aliba tesem nungi kilometer 1,600 shi pilar Perm yimti nung Ukraine indang drones agi industrial facility ka amak saka asü-amaba mali, ta Governor Dmitry Makhonin-i ashi.

Southern Rostov region nung Governor Yuri Slyusar-i ashiba agi, Sea of Azov nung aliba rongnendak Taganrog yimti nung missile teraksa apartment building ka nung tsükba ajanga tetsür ka asü aser tebur ka yiru.

Ukraine ket nungi 2014 küm Russia-i rakzükba Crimean peninsula nung Moscow-i bhukumba governor Sergei Aksyonov-i ashiba agi, Mongulbar aonung drone amshia amakba nung nisung ana asü aser pongu yiru.

Ukraine tsütsü Russia-i drone amshia Kherson yimti nung amakba mapang tebur ka asü aser asem yiru, ta yangji aliba ketdangsür temi ashi.

Russia indang Defence Ministry-i Ukraine nunger rongnendak yimti Odesa anüdoklen nok-nü aser mitkar oset bena aliba rong ana nung drones agi amak ta ashir.

Japan menoknok nung asür nisung 18 jungogo

Kumamoto, Chiteni/July 29 (Agencies): Japan southwest tsütsü menoknok tesashi ka anoka bendanger ka densema nisung 18 takum samatsüba sülen Bodhbarnüa sepaitem aser emergency workers temi kanga sashia raksar aliba shopping mall ka aser ki chireper aliba nung takum alirtem bushir.

Kyushu asetkong kübok Kumamoto tesem nung Bodhbarnü menoknok magnitude 7.1 anokba yagi nisung 62 yiru, aser item rongnung par trok kanga sashia yiru, ta prefectural sorkari ashi. Asürtem meilongi timba akumer, anungji ano maneni tasür alitsü akok ta tsüboteper.

Iba den ano tzüngdang

kanga atsükba ajanga menoknok lendong nung takum jenburtem asoshi tebilemtsü akar. Tang tashi nisung kwi samar aliar mejangjateter.

Kashima yimti nung aliba Aeon Mall shopping center nung teraksa tamajungtiba liasü, kong nisung meyirijang aika adenshia lia menoknok ya anok. Customer 3,000 shi gari anena ayuba tesemi anizüker lia kasa mall tesem külen gas apok, aser iba mapang nisung kar mapa inyaka liasü.

Iba mall indang floor tanabuba chirepa nisung kar nembang. Iba sülen gas apokba ajanga iba tesem nung menoknok anokba den kasa anokshitsü ta ashir.

Mall nung nisung asem

samar bushir aser nisung pezü asüba jangjaogo, ta Aeon tir Akio Yoshida

Three people remained missing, while four deaths were confirmed at the mall site, according to Aeon President Akio Yoshida-i ashi.

Iba anasa Yatsushino nung Nippon Paper Industries factory ka indang chimney laoa nisung pongu asü aser nisung tenet kumzük ta Kumamoto prefectural government disaster team ajanga ashi.

Yangji ano nisung pezü nembanga alitsü südi ta amanger, ta parnoki ashi.

Bendanger ka asüba ya Vietnamese technical intern ka liasü, shiba pa inyakba factory ka nung crane laoka pa dak

36buba Nagaland State Taekwondo Championship tenzükogo



Kohima, Chiteni/July 29 (TYO): 36buba Kyorugi aser 1buba Poomsae Nagaland State Taekwondo Championship 2026 den Under-14 "Catch Them Young" asayamung Mongolbarnü IG Stadium, Kohima nung tenzükogo. Iba asayamung nung Nagaland kübok tesem balala nungi taekwondo asayar aser ketdangsür 500 shi-i shilem agidar, koba anogo asem asayatsü.

Asayamung ya Nagaland Taekwondo Association (NTA) aser Department of Youth Resources and Sports (DYRS) na longjemer state nung taekwondo asaya ajungketsü aser Kyorugi (sparring) aser Poomsae (patterns) naprongla nung tetoktepba ajanga lanur asayartem anitetsü nükjidong nung ayongzükogo.

Asayamung lapokba sentong nung alakteta jaoker ama o jembiba mapang Superintendent of Police, Kohima, Krodi Rhetso-i, asayartem dang taküm asaya naprongla nung pei taküm yimya azüoktsü, aremzüka tanen makai inyaktü aser sportsmanship tanüla sayutsü ajungshi.

Taekwondo ya taküm yimyayimpong yanglutsüba asaya ka ta shia Rhetso-i, martial art ajanga angazükbatem yimyatam ya tetoktepba tesem nung dang tongtibang masü saka iba yagi

shisaluyim, career aser pei taküm nung takok asoshi teyari agütsür, ta ashi.

Paisa, asayartem dang iba asayamung nung shilem agir ajak ya takoker kaka lir, kechiyong parnok ajaki state championship tongtetsü atema tetsükdaktsütem ajak koktetogo ta ashiba den tamakok anguba agi tezü danga malitsü ajungshi.

Under-14 "Catch Them Young" tenzükba pelashishia agizüka Rhetso-i, tanur asüba mapang nungi asaya nung shilem agitsü atema maongka agütsüba atema NTA aser DYRS

na dang kanga pelaba lemsatep.

Paisa, iba inyakyim ajanga national aser international jenjang nung Nagaland tenüng nungi asayatsüpur anitetsü ta ashi.

Sentong nungsa lokti pela agizükba o jembiba mapang NTA tir Pele Khezhie-i, Nagaland nung taekwondo asaya renloka aoba indang metetdaksü, aser Department of Youth Resources and Sports-i maneni teyari agütsüba atema pelaba lemsatepa liasü.

Paisa, Nagaland nungi asayartemi School Games Federation of India (SGFI) National Taekwondo Championship nung medal anguba indang metetdaksü. Iba asayamung nung Shiusuthong-i gold aser Keyizieteibe aser

Sudeh Lamliu nati bronze medal ngua liasü.

Khezhie-i, Nagaland nung taküm December ita Under-14 SGFI National Taekwondo Championship ayongzüka asayatsü aliba metetdaksü. Paisa, iba asayamung nung medal anguba asayartem iba national asayamung nung state tenüng nungi asayatsü maongka angutsü ta ashi.

Meghalaya Open Taekwondo Championship, Sikkim Open International Taekwondo Championship aser Kukkiwon Open International Taekwondo Championship nung Nagaland asoshi konang tetushi bener arutsüba asayartem nem tenügsang agütsüba mapang pai, Meghalaya Open nung Best Coach Award anguba atema Visabiu Peseyie nem tenügsang agütsü.

Maneni pai Nagaland technical officials Anirudhr Pandey, Alito Sema aser Druvichuno Rutsa nung Arunachal Pradesh nung 69buba Under-17 SGFI Championship ketdang asütsü shimba indang metetdaksü.

Sentong nung salem osang lemsatepba mapang Joint Director of YRS Khriehutuo Tsira-i, Nagaland nung December 14 nungi 18 tashi Khelo India National School Games Under-14 Taekwondo Championship ayongzüka asayatsü ta ashi.

Neymar-i pa International Career tembangba jangjashitsüogo

Chiteni/July 29, 2026 (Agencies): FIFA World Cup round of 16 nung Brazil team tsükba sülen Neymar-i pa international asaya nungi anisüngzükba sangdongogo, aser tang pai pa temlung memelenshitsü ta nenshia metetdaksüogo.

Brazil team taküm World Cup nung Round of 16 nung Norway goal 2-1 agi makokba sülen tsüka liasü. Iba asaya nung Neymar bench nungi ia penalty ka idaktsü, koba pa indang international career nung tatembangbuba goal liasü.

Iba goal idaktsüba sülen pa puti otsü kakat nung zülüokogo.

Neymar ya Brazil nung asayartem rongnungi Pelé sülen FIFA World Cups (2014, 2018, 2022 aser 2026) pezü nung goal idaktsüba asayar tanabuba aküm.

Pa ya Brazil nung rongnungi goal timtiba (80) idaktsüba asayar ama asaya nungi anisüngzükogo. Pa linük team nungi 130 ben asayaogo aser pa dang nungi Cafu-i (142) dang national team nungi timbaben asayar lir.

Santos puri goal 4-2 agi Universidad Central akokba sülen jembiba mapang Neymar-i pa international jenjang nung ojang dang asayatsü ta shiogo.

"National team nung kü mapang tembangogo," ta Neymar-i ashi.

"Ni otsü tasen yangluogo, ni kanga pelar, ni kü azü aser taküm bendanga agüja asayaogo, ni yellow jersey atema takok tashi meranga asayaogo, saka ni joko ojang dang asayaner," ta pai ashi.

Neymar tang Santos nungi asayatsü asoshi rangloker lir, saka pa tarutsü mejangjai lir. Pa club den tenangzüktepba yanglur aliba December ita tembangtsü aser Brazil nung osang balala ajanga ashiba agi, tenangzüktepba yanglushitsü atema kecha jembishiniü masür.

Shubman Gill ODI nung No. 1 batter kümogo

Chiteni/July 29, 2026 (Agencies): Bodhbarnü sayaba ICC ODI batting rankings nung India captain Shubman Gill-i New Zealand nung asayar Daryl Mitchell ajateta world No. 1 batter kümogo.

Gill-i rating point 801 nguteta Mitchell ajatetogo, shibai point 794 nguteta lir. Pa tawa West Indies den ODI asayamung nung masayatei liasü.

50-over format nung kanga junga asayaba sülen Gill ya maneni temaba jenjangi tuogo. India captain ya taoba mapang No. 1 batter liasü, saka pa taküm küm tetenzüklen Mitchell-i ajatet.

ODI batting rankings nungsa India nung rongnungi Virat Kohli tasembuba aser Rohit Sharma pezübuba nung lir. Iba tetezü ODI batting rankings top 5 nung India nung asayar asem lir.

Maneni Shreyas Iyer aser KL Rahul nata top 20 nung lir. Iyer tang 13buba aser KL Rahul 18buba nung lir.

Bowler tem rongnung Namibia nung spinner Bernard Scholtz jenjang pongu tejakdangi tua tang tenetbuba tongtetogo. Nepal aser Netherlands na den League 2 tri-series asayaba mapang pai kanga junga asaya liasü.

Test rankings nung West Indies nung all-rounder Justin Greaves jenjang 21 tejakdangi tua Test bowler tem rongnung tang 48buba nung lir. Pa all-rounder rankings nunga jenjang ti tejakdangi tua tekububa tongtetogo.

Maneni Test bowler tem rongnung Jayden Seales 24bubai tuogo aser Pakistan pacer Mohammad Abbas-a 17buba nung lir. Babar-a Test batting rankings nung jenjang 4 tejakdangi tua tang 15buba nung lir.

CWG 2026: Gulveer-i silver medal ngua otsü tasen yangluogo



Chiteni/July, 29, 2026 (Agencies): India nung long-distance runner Gulveer Singh-i, Glasgow nung tang asaya aliba 2026 Commonwealth Games nung tebur 10,000m asemtepba nung silver medal nguogo. Pai alizüing 27:49.78 nung tongteta liasü.

Gulveer-i iba asaya nung silver medal mangu tsüngda India nung tebur asayar kati danga Commonwealth Games nung 10,000m asemtepba nung medal ngur maliasü.

Pai otsütsüta iba asaya nung medal anguba sülen Glasgow Games nung India nung asayartem ajak senteper medal 12 ngutetogo. Gulveer-i silver medal anguba ya India asoshi 2026 Commonwealth Games nung silver medal tenetbuba liasü.

Sarvesh Kushare sülen Gulveer ya Commonwealth

Games 2026 nung athletics asaya nung medal anguba tanabuba asayar kümogo.

July 28 nusa India tsür weightlifter Harjinder Kaur-i tetsür 69kg final nung silver medal ka ngua liasü.

Arishi küm 29 tain asayar yagi snatch section nung 96kg, 99kg aser personal-best 101kg ajungketa liasü. Lai 101kg ajngketba ya mapang tatsüka atema Games Record liasü, saka Canada tsür junior world champion Charlotte Simoneau-i 108kg ajungketa record tasen yanglu.

Boxing asaya nung Jadumani Singh (men's 55kg), Priya Ghanghas (women's 60 kg) aser Preeti Pawar (women's 54 kg) nung ajaki medal kakabo angutsü jangjaogo. Parnok ajak pei category nung semi-final tongogo.

BILEMDANGANG

"Matalokdang yongi tali bilemba ajanga nisung ka taliba kangshidaktsür."